

Es Lebkucheherz

Günter Mannweiler

(nach der Idee eines unbekanntem Verfassers)



Uf de Kerb am Zuckerstand
steht, es Fritzje an de Hand,
de Opa, losst de Klää was suche.
Der nemmt e Herz aus Honigkuche.

E riesig groß Lebkucheherz
erfreut dann's kläne Kinnerherz.
Mit Zuckerguss und bunte Perle
hängt's vorm Bauch dann vun dem Kerle.

„Fritzje, loss uns weitergeh,
es gäbt jo noch viel mehr zu seh!“

De Opa schießt drei Plastikrose,
am Losstand gäbt's e Handvoll Lose,
un noch e Herting werd geschlickt,
bis dann dem Bub sei Bleesje drickt.

„Du Opa, ich misst mol e Bach,
bevor ich in die Hosse mach!“
„Ja awwer wo, Fritz, du bisch gut?“
Er guckt un sieht die Imbissbud.

Hinnedro steh'n Kischte rum.
„Dort werd's geh, jetzt dabber kumm!
Mach dei Rappelche ganz schnell,
während ich mich vor dich stell!“

Es Fritzje macht es Lätzje uff,
Druck hat er gewaltig druff.
Do kommt e Windstoß angebraust,
der net nor um die Ohre saust.
Er trifft es ä- un annermal
Fritzjens warmen Wasserstrahl.
Und dieser Strahl, der trifft sogleich
das Herz vorm Bauch und macht es weich.

Vorbei is jetzt der Kerwespaß,
es Fritzje weint: „Mei Herz is nass!“

Doch Opa stillt des Enkels Schmerz
mit me neie Kucheherz.

Jetzt hat er zwä: das nei, das nasse
und will de Opa wähle lasse,
was mit dem nasse soll gescheh.
De Opa hat glei e Idee:

Das gäb de Oma, die is froh,
und tunke duht die's sowieso!

